

**■ TRIBUNA ELECTORALA**

# Magdalena Martullo sa sbaglia

DA PETER PEYER, PS GR  
CANDIDAT PER LA REGENZA, TRIN

**A**vant curt è Magdalena Martullo s'exprimida a chaschun d'ina conferenza da medias da la pps ed en las medias grischunas davart il tema libra circulaziun da persunas, mesiras accompagnantas, e contracts da lavur collectivs. Sias constataziuns pon ins resummar suandantamain: La libra circulaziun da persunas, las mesiras accompagnantas, ils contracts da lavur collectivs e pajas minimalas fan donn al martgà da lavur svizzer.



**T**enor las pli novas cifras da l'index è la Svizra il pajais il pli productiv ed il pli innovativ dal mund. Probablmain essan nus er il pajais il pli ritg. Il bainstar è distribuì pli u main da maniera vasta, la forsk tranter fitg ritg e pauper n'è betg fitg averta en cumparegliazion cun auters pajais. Apparentamain na fan ni la libra circulaziun da persunas ni cundiziuns d'engaschament gistas ni pajas onestas donn a la Svizra. Il cuntrari: 100 onns suenter la chauma generala che ha manà en Svizra bunamain a cundiziuns d'ina guerra civila, è la relaziun pli u main constructiva tranter patruns e lavurants in dals motivs per il success economic da la Svizra. La basa per questa situaziun è stada la cunvegna da pasch dal 1937. Sut l'impressiun da las smanatschas d'ordaifer il pajais èn las forzas raschunaivlas da las uniuns d'economia e dals sindicats sa cunvegnidas. Ins



ha definì reglas co schliar conflicts e dispitas da lavur. La pasch da lavur ed il partenadi social èn sa cumprovads enfin oz.

**I**dat dentant in pèr sfidas per ils proxims onns. Ultra da la midada dal clima è quai en spezial la digitalisaziun. Sias consequenzas per las plazzas da lavur, ils profils da professiuns, il temp da lavur ed il temp liber èn anc diffusas e vegnan validadas da maniera differenta tut tenor il puntg da vista.

**I**l success u la disditga da la globalisaziun or da vista dal bainstar general vegnan a sa mussar vi da l'abilitad da la politica da transfurmar il progress tecnic er en in progress social. Per far quai stuain nus chattar respostas persvadentas a dumondas centralas sco:

**V**egnain nus da purtar il progress da productivitat da process digital ed automatic tar tuts e betg mo tar ils acziunaris u tar ils pajais industrials?

**D**ovri en il temp da l'intelligenza artificziala plitost in rinforzament da la creativitat, dal pensar critic e da l'intelligenza emoziunala enstagl da met-

ter il focus sin ils uschenumnads roms da Mint?

**C**o transfurmain nus noss sistem fiscal per realisar a favur dal bainstar general la midada da la lavur dad umans a la lavur da maschinas?

**C**o modifitgain nus nossa legislaziun da lavur e noss systems socials, per ch'ìl progress digital na produceschia betg bleras perdentas e blers perdents sin il martgà da lavur?

**C**o sviluppain nus noss systems da medias e d'infurmaziun per ch'ìn schurnalissem independent possia ademplir sia funcziun tar la furmaziun d'opiniun e tar il mantegniment da la democrazia er en in temp cun ina saturaziun d'infurmaziun digitala.

**C**o protegin nus la sfera privata e las datas da burgaisas e burgais da l'access dal stadi, ma oravant tut era da l'access da concerns e d'auters interess commercials?

**B**leras dumondas! Ina resposta è dentant cle-  
ra: Mo sch'ì ans gartegia da far avanzar la digitalisaziun a favur da tuts savain nus rinforzar il bainstar e la forza d'innovaziun da la Svizra. Nus stuain ans cunvegnir, sco il 1937. Attatgas frontals sin ils pilasters principals dal success, sco quellas da Magdalena Martullo, n'èn betg mo faussas perquai ch'ì pertutga lur cuntegn, ellas fan era donn a la Svizra. Ellas impede-schan il progress.

Dapli sin: [http://www.sp-gr.ch/wp-content/uploads/2018/02/Digitalisierungspapier\\_def\\_PT.pdf](http://www.sp-gr.ch/wp-content/uploads/2018/02/Digitalisierungspapier_def_PT.pdf)